

27/01/2004

Kesetiaan pastikan kemenangan Umno

BAHAU: Ahli Umno diingatkan supaya terus setia kepada parti bagi memastikan calonnya dapat memenangi semua kerusi yang ditandingi pada pilihan raya umum yang dijangka diadakan pada bila-bila masa.

Ahli Dewan Undangan Negeri (ADUN) Sungai Lui, Datuk Anuar Rashidin, berkata kesetiaan kepada parti dan pemimpin penting untuk menjana kekuatan parti dan kesinambungan pemerintahan kerajaan Barisan Nasional (BN) yang ditunjangi Umno.

"Justeru itu, saya berharap semua ahli parti sentiasa memberi sokongan padu dan berjuang memastikan calon Umno dan BN dalam pilihan raya umum akan datang," katanya berucap pada sambutan Jubli Emas BN dan perayaan Gong Xi Fa Cai DUN Sungai Lui di Terminal Ayer Hitam, dekat sini.

Majlis itu dirasmikan Menteri Besar Tan Sri Mohamed Isa Abdul Samad dan turut dihadiri isterinya Puan Sri Hazizah Tumin.

Anuar berkata, pemimpin BN perlu berusaha kuat untuk memastikan kemenangan besar BN sebagai tanda terima kasih kepada bekas Perdana Menteri Tun Dr Mahathir Mohamed yang telah banyak berjasa kepada negara selama 22 tahun menerajui negara.

"Kemenangan dalam pilihan raya umum nanti juga harus menjadi "hadiah" yang paling manis kepada Perdana Menteri kita yang baru Datuk Seri Abdullah Ahmad Badawi dan timbalannya Datuk Seri Najib Tun Razak agar dapat memimpin negara dengan baik," katanya.